

秋

笳

集

雜體詩序

雜體詩之擬始于謝康樂盛亡

漢風旣非一骨魏製晉造固亡

而俱動于魄芳草不同馨而悉悅于魂非性情使然歟予友吳子漢槎衛子冰清謝家玉潤翩翩雋逸望者疑神仙中人及讀其詩則又氣體高妙波瀾獨老盧駱王楊之藻采李杜高岑之風則無不兼備蓋擬議之迹化天然之致勝也使與北地信陽並驅中原尙當退避三舍矧歷下長興諸公哉今秋予過松陵漢槎出擬雜體詩示予聲情慷慨格調悲涼大有山河離別風月關人之感焉仲宣流連于漢南子山羈

旅于江北帶甲滿天笳歌動地文人遘會其時性情
實有相符者胡霜金柝之章蕙草闌干之句信可以
鑠謝凌江矣豈云團扇秋風芙蓉綠竹取古人之眉
黛代一已之萱蘇已也酒酣耳熱涼星三五戲語漢
槎歲月不居風流易散後有作者于弘人研德甫草
茗文俊三武功諸子未知當作何擬漢槎其操不律
以豁我愁乎

吳門同學盟弟宋實穎旣庭拜題

雜體詩序

西陵同學弟陸圻拜謨

原夫河梁贈答實肇風徽鄴下歌謠漸多辯麗五言之盛可得而言然如子荆以零雨見珍康樂以春草特妙以至司空兒女之玼延年雕績之累莫不性取獨適家罕兼善譬之觀魏闕者蘭錡之第橫陳入越都者緡纜之榮不愜此言殊軌者易爲工而通方者難爲巧也乃若醴陵創調雜體名詩筴簞匏管九吹之變悉和橘柚楂梨一啜之鮮不御庶幾力同賁獲才甚驃騎真天姿之備嫩人外之絕智矣然世風代降擬作爲繁薛君朵馳騁嗣音王弇州條列羣品頗

多虎賁之形不失虞丘之貌而今時如吳子漢槎者
辭爲南國之宗名在延陵之季遠隨羈宦遇閣題銘
近同傷亂當筵流涕身賁油素無不推其贊文容比
珊瑚俱欲爲之作架斯固三虎之稱偉節八龍之有
慈明矣乃復以銷暑放愁幽居綴藻踵江生之後綜
諸子之長循其時次亦擬作三十首上自宣城下迄
司隸景物興會仰溯曩符神韵格調取高前式所謂
雕組之文本異杼而均炫于目芳香之草不同岑而
皆襲于裾也至若太元天監旣不一揆河右江左亦
又二致居南服者未識儋面產北方者不曉吳語斯
固物理之自然實非品類之難協而吳子形容著勝

阿堵之蘊悉傳刻畫中規縱橫之態已極狀如胡寬
營新豐而鷄犬競識仲謀捫屏上而蒼蠅欲飛斯已
奇矣後有作者先河後海則吳遜文通祀近祧遠則
吳盛王薛豈非記室之後勁好事之深憂也哉

擬古後雜體詩卷六

吳江吳兆騫漢槎著

詩五

謝吏部朏省直

王寧朔融遊邸

江記室淹楚望

梁簡文帝綱閨思

梁元帝繹述懷

沈特進約三日

范僕射雲貽友

邱中郎遲宴別

柳吳興憚擣衣

庾度支肩吾侍宴

何水曹遜示寮

蕭東陽子雲望春

虞常侍義北伐

吳朝請均春怨

徐內史俳酬友

劉秘書孝綽歸沐

劉庶子孝威咏月

庾開府信咏懷

陳後主叔寶禊飲

徐僕射陵春情

沈侍中炯自傷

陰常侍鑑送別

張散騎正見汎舟

江僕射總羈思

魏特進收喜雨

盧武陽思道贈別

李內史德林消夏

隋煬帝廣寒宴

楊楚公素山齋

薛司隸道衡酬憶

擬古後雜體詩卷六

吳江吳兆騫漢槎著

謝吏部朏省直

鴛鴦壯九重，鳩鵲拒雙闕。金莖麗綺霄，珠綴延華月。
扶宮鳳吹揚，周廬虬水徹。高柳承檻低，珍卉映堦發。
伊子荷薄弱，謬登建禮闈。鳴玉慚俊民，抽簪謝往哲。
歸歟嗟滯淫，懷哉嘆遙越。何時返初服，山海恣遊陟。

王寧朔融遊邸

得性身自餘，服理物斯辯。初地旣容與，朱邸聊遊衍。
芳草被蘭唐，鮮飈流桂殿。素波汎文禽，綺疏來早燕。
雲陰散松涼，露華承蕙轉。空墀綠篠深，幽石蒼苔徧。

選哉塵外鑣天伐從茲遣

江記室淹楚望

驅馬出楚宮逍遙望嶙峋軌路遶江臯巖巒俯城闔
雁下長沙渚山入蒼梧雲餘霞帶遠岫曾暉媚遙津
氣清漢坻合烟盡荆流分佳期怨遲暮羈孤傷美人
綺羅空徙倚簫鼓奏悲辛韓娥渺難作徒令憂思殷

梁簡文帝綱闥思

紫臺君遠戍青波妾獨居共知離夢杳詎信合歡疎
絃中悲別鶴簾外聽懸魚瓊鉤臨戶永金漢度窻虛
約素腰逾細窺紅眉未舒思縈歸燕後愁劇擣衣餘
願托交龍錦千里寄長榆

梁元帝繹述懷

鄂渚樓船擁荆門幕府開
麾軍占霸氣拓地想雄才
風清朱鷺發塵飛紫燕來
芙蓉依劍合蘭葉映旗迴
別騎通明月前驅下大雷
浮蛟三翼動射雉兩甄催
崩憶顧榮畧笳分越石哀
幾時平日域一爲寫雲臺

沈特進約三日

新陽開上巳淑景發皇州
修楊蔭馳道芳樹夾高樓
槐里盛遊俠蘭池來子侯
宛轉銀平脫縱橫金絡頭
宜春雜花發小苑鶯聲流
珠袍映日轉綺幃逐風游
鬬雞歸下杜走馬出長秋
懽娛盡永日薄暮還相求
翠釵時獻笑蛾眉詎含羞
結風張女彈防露楚妃謳

但營九春樂安知百年憂

范僕射雲貽友

暮春事耕作荷鋤適南岡日夕巾車歸桑榆暖頽陽
稚子前致辭有客登中堂旌車耀里閭徒御盈道傍
華纓何飄搖金羈自生光物情忽明義榮悴爲低昂
自非同門友疇能顧窮鄉鮮柯無槁葉寒谷有嚴霜
臨風播遠情懷思徒慨慷

邱中郎遲宴別

華鐘啓未央鑾輿戒平旦微風舉翠華澄霞照瓊弁
林長羽騎疎地迴鳴笳徧天采散繁陰綿羽流餘轉
聖朝重明牧介弟臨淮甸虎竹分壯圖樽酒延皇盼

微臣愧作頌明義詎能展

柳吳興暉擣衣

閒房汎虛景夕戶引離歌珠簾浮素月羅幌見明河
思繁幽怨集枕獨夜情多誰憐懷日逐聊復理雲和
雲和夢以清悲君尙遠行鳳城宵露結龍沙秋草生
遙榭聞花漏虛堂掩畫屏寒衣何處寄刀尺自傷情
靡蕪增永慕芙蓉空掩嫫君猶塞北衣妾擣城南素
碧樹下涼颼金荂凋白露連娟斂秀眉窈窕迴纖步
步帳肅秋陰長廊叩夜砧短衣催急節繁杵散哀音
涼生紅袖薄霜潤翠環沈不念關山遠安知賤妾心
妾心空宛轉臨篋倍殷勤連烟裁鳳子細綺織鴛紋

坐愁金井葉永睇玉關雲九秋徒有恨千里一思君
庾度支肩吾侍宴

期門宵警蹕輦路曉迴鑾屬車開月羽容衛載風鳶
曙色新豐遠春陰太液寒文鶯留綺樹華桐媚遠山
珠旗花際出瓊釵柳中看緹帷麗平野綵吹震長巒
宛轉魚龍戲紛陳爵馬盤分袂羣工醉賜醑萬方懽
徒知薦綠水空愧頌猗蘭

何水曹遜示寮

重巖嵐翠渺荒薄烟光聚晨月媚空波落星帶江樹
的的洲迴帆蒼蒼山寫霧風緊曉猿悲霜空孤雁度
漂搖行旅情棲遲遊子慮懷人思故山撫舊傷往路

幽期既已乖賞心庶能遇眷此平生懷悼茲年歲暮
方謝金閨彥去采瑤岑露

蕭東陽子雲望春

蘅臯生薄陰槐路耀鮮旭遵野協幽情臨高送遠日
烟柳暗春隄風花盈霧谷遊客影羅纓都人馳繡軸
綺榭日華新金溝波影綠拾蕙自容與采蘭性幽獨
一卧茂陵園空想藍田曲

虞常侍義北伐

漢家事遠畧飛將山遼西遼西亭障遠驚沙千里飛
邊秋橫殺氣戎馬咸精肥交河隴雁少涼州塞草衰
黃雲斷烽火嚴飈動鼓鼙鳴鏑響空磧高旗動落暉

絕漠樓煩騎陷陳羽林兒胡霜金柝冷邊月蘆笳悲
軍前獻當戶鼓下坐闕支揚旌高闕塞振旅蹕林祠
功成班勇爵塞靜脫戎衣勲名詎終極人事無長期
羅綺方娛樂金石已潛移蕭條瀚海外萬古起雄思

吳朝請均春怨

朝日下房櫳微風蕩簾幙百草媚芳春孤妾長漂泊
蘭徑蝶雙飛玫砌花空落含情羅帶賒緘怨親梳薄
遊絲不繫愁折柳詎行樂悽斷玉關書長悲金枕約
空梁有燕歸虛檐見蛛托燎絕博山爐塵染歲蕤餘
羅衣欲寄誰鸚鵡徒自酌春雁有歸音鑒此平生諾

徐內史俳酬友

疏龍起漢闕踐華表秦城山川開險介樓觀壯神祠
麗譙侵漢遠崇雉入雲平乘墉時絕目西北見咸京
桂宮通復道柘館抗飛甍光風金爵舉斐雲露掌明
三條躍飛燕九市揚華纓少年負豪俠結客飛英聲
五陵爭博進三河習射生思逐驃姚戰羞邀劇孟名
何當逢漢主負羽出幽并

劉秘書孝綽歸沐

逍遙出瑣闥還顧望曾宮鬱鬱迎風觀繁樹遠青蔥
滄池含宿霧微道隱長虹犀戟分平右冠簪入鏡中
梅落文梁迴蓮披藻井空咨予羈薄宦弦望已三終
塵纓愧方結初衣嗟莫同幸遲司隸舉寧思武騎通

美人盛文藻作賦儷雕蟲時厭承明內言訪瀟陵東
據地憐方朔好事慰揚雄還期命芳醴折芰奏絃桐

劉庶子孝威咏月

城烏曉未歇顧兔已飄颻只自臨遙夜寧知隔兩鄉
風輕榆未落露濕桂無香寒入哀笳斷光侵雁柱涼
征人鸞朔苦思婦鳳城傷歛恨低珠箔含嚔掩玉腸
破鏡空相憶刀環莫暫忘倘遇交河使知妾日霑妝

庚開府信咏懷

公主思鄉館將軍出塞臺共此關山別誰憐舊國哀
歸路胡雲斷羈心羌笛催南音終日操北雁幾時迴
玉枕無消息珠簾有劫灰唯餘瀟陵岸王粲獨徘徊

陳後主叔寶禊飲

春芳開禁苑佳麗啓層城柳弱銅溝暗花舒綺殿明
廣場陳曼衍遠樹出千旌景移金埒馬風度石城鶯
蘭雲隨舞聚桃扇倚歌輕列侍紛紃綺雜坐盛簪纓
吹雲鳳管合激水翠樽盈懽洽追南館樂闕指西清

徐僕射陵春情

春歸嚴氣解草長豔陽還銀箭傳遲日香篝減薄寒
蟬扇迎風淺羅衣入晚單纖柳分黃約倡桃學錦檀
年芳憲際度花勝鏡中看殷勤懷蕙草留取寄闌干

沈侍中炯自傷

中郎來北海班生返玉關舊京方改步行子已凋顏

花疑狼望雪樹隔隴頭烟猶驚鳴鏑騎空拊大刀環
澤葵棲廢井衰楊望故山甲帳空零落金輿遂不還
悠悠建鄴水徒自送潺湲

陰常侍鑑送別

理舳臨南浦停鑣送北征可憐遊讌地還作別離亭
草歇吳洲晚潮歸楊子平蕭條隨去雁悵望抗行旌
新知空復樂遊子正含情明月金樽掩春風蘭槳輕
思君憐楚調寄遠托秦箏悠悠千里別應悲李少卿

張散騎正見汎舟

仙郎初賜沐上客事行遊試出千金堰還登雲母舟
蘭橈迴枉渚錦紵向芳洲雨歇花疑暮風歸雁帶秋

碧澗文虹飲丹岑夕景收未曾繡披擁先聽采菱謳
江僕射摠羈思

麗譙秋引霧睥睨晚棲烏瘴烟生桂水蠻雨暗蒼梧
簾疎山靄合帆斷海雲孤平野歸遊騎長天落遠鳬
望鄉深別恨作客泣窮途莊舄徒思越盛憲尙留吳
還悲洛陽殷無復女珊瑚

魏特進收喜雨

清陰生石礎繁雲上夕峯湘東爭起燕膠西未刻桐
苔滋全汎碧花潤半舒紅風細虬簷靜涼輕翠幙空
滴沼文漪散霑樹遠烟重自解吳王戲寧勞漢掾功
盧武陽思道贈別

車令持金馬王褒祀碧鷄何如乘漢驛千里撫關西
赤車矜使遠綠酒送將離曉月函關路春雲華岳祠
青門臨玉道素滻合金隄槐疎餘舊里蘭衰蔭廢池
灞岸行迴首林光起弔思塞迴看旌度山長聽馬嘶
聊持陸賈劍還開隗氏泥勞旋奏明主應見賜青驪

李內史德林消夏

冰臺聊暇豫露觀暫徑過輕颺流綺樹繁陰下素波
高窓清薤簟幽檻動纖羅才人絡雨織宛女采蓮歌
晶屏交扇薄玉袖倚簫和畏此沈陽麗晞髮晚山阿

隋煬帝廣塞宴

旌驅玄菟塞輦下白狼川魚雲開毳帳雁磧斷胡烟

骨都空候月金人罷祭天獻壽琉璃酒承恩瑪瑙鞭
還嗤漢武帝十載事祁連

楊楚公素山齋

卜築謝朓塵棲山樂所秉礪石結春陰磴道澄烟景
雲歸松徑清日夕蘭泉靜宵露流素暉新桐發疎引
清緩鳴樹幽風簾臨砌永緣綺有哀音美子無還軫
偃仰空山中樽酒誰爲飲

薛司隸道衡酬憶

念子三秦役愁予千里分吹簫還獨息對酒已離羣
離羣日以遠王孫殊未還碧草盡芳菲綠波春晚晚
春晚歷芳洲相望空悠悠日麗蓮花影天清竹箭流

流年不相待忘憂無復采長懷白首期還睹素衣改

秋笳後集卷七

吳江吳兆騫漢槎著

詩六

撫順寺前晚眺

經灰法故城

奉贈函公五十韻

送人從軍

贈秦州李生

陪諸公飲巴大將軍

宅

送人之羗突里兼柬

陳子

讀張坦公先生所撰

徵音集却贈

張坦公先生談甲申

歲河北討賊之事感賦

酬陳子長七夕見懷

浚稽曲

上巳奉陪都統安公遊飲西山十韻

贈陳生昭令

同林生夜宿淨公房時林來自咸鏡

送人還蒙古

冬夜伍謀公齋同錢

德維作十韻

同陳昭令過西山蘭

若十韻

與友人夜飲却贈

送金譯使之朝鮮

贈陳蓉旬三首

再贈孔公

長白山

上京

擬唐人謝真人仙駕

還舊山

送人之平遠

王昭君

夜宿

沙林同友人登完顏故臺

會寧道中有古墟墓賦此弔之

送巴參領之挈洛 三月十二日河上口

號

奉贈封山使侍中對

公

贈滇令巴郡葉明德

四首

咏鷹

奉贈大將軍巴公

奉贈副帥薩公

繭虎追和梅村夫子

養鶴

蟬猴

贈陳昭令二首

觀獵贈陳昭令

獵後再贈昭令

都統郎公奉使塞外賦此奉贈二首

宋方集卷之四
送人至鴉青江

送陳昭令之元喇十

韻

春暮江上凍解同諸

君放舟至白崖口賦示十韻

奉寄安大將軍二十韻同錢德維作公以寧古

副帥擢鎮奉天

寄顧梁汾舍人三十

韻

雜感二首

讀古人詩有感

混同江

擬唐人御溝新柳

贈陳蓉旬十韻

郎公將還京師賦此奉送

奉酬徐健菴見懷之作次原韻

集成侍中容若齋賦得柳毅傳書圖次俞大文

韻四首

春夜聞弦索限琴字

咏史

月夜

補遺

李侍御枉駕因留小飲 壽郭明府

送丁泰巖晉秩開府之任湖南二十韻

明妃曲

咏龍鷹應教

戲贈

登樓有懷成容若

和凱之送令兄侍中 扈從之作

贈葉長民

秋笳後集卷七

吳江吳兆騫漢槎氏著

撫順寺前晚眺

亂山殘照戍城東立馬蕭蕭古寺空
接塞烟嵐天半雨背人鵬鶚晚來風
遼金宮闕寒蕪裏劉杜旌旗野哭中
俯仰不堪今昔恨欲將空法問支公

經灰法故城

雪峯天畔見荒城猶是南庭屬國名
空磧風雲當日盡戰場楊柳至今生
祭天祠在悲高會候月營空想度兵
異域君臣興廢裏登臨幾度客心驚

奉贈函公五十韻

師廣州人故大宗伯韓公之子也

蒼茫龍塞謫蕭寂虎溪遊白拂真詮遠青山道臘優
風銛譚淩淩霜映髮髟髟問訊師當日東南與僂流
尙書蒼玉珮公子白廳裘士譽烏皮几家聲龍額侯
門方叅許史才欲駕應劉衆目爭看駿孤懷早狎鷗
寧知纓冕貴祇覺鼓鐘愁茂齒遺家室良時逐海陬

崇禎中師棄諸生
入羅浮山爲僧

買山心自迥作佛志偏遒猿狖遙

峯晚松杉野寺幽座看多寶出園許布金祠入定巖
花變棲禪澗雪留隨緣辭越嶠傳法過吳州夜磬牛
頭寺春帆鵠尾洲折蘆波汎汎持鉢路悠悠途值軍
鋒滿時當王氣收邊塵蒙鳳輦戢火入龍樓慘黯逢
遷鼎間關濟法舟緇衣空掩泣青蓋竟貽羞野瘞王

琳骨析梟袁桀頭問誰歌玉樹遂爾缺金甌怨矣殷
頑事傷哉曹社謀已移劉氏臘空愴薛談謳石闕悲
三日金鳧哭一坏裁詩祠毅鬼續些弔靈修淚盡平
陵柏哀纏原廟楸自難忘舊德何敢賦幽憂徒下遺
民泣還來弋者求志原甘鼎鑊身遂落罟罟割體非
歌利囊頭及比丘篋輿何激烈岩棘屢呼囚豈是然
身誓應強繞指柔恩仍赦藥布罪竟放驩兜空法原
無住窮荒任所投狼河雲漠漠馬窟雨漉漉掃雪開
禪徑披沙問憤溝一乘馴鐵騎半偈化韋韞白雀飛
仍集青蠅弔可休半生遼海月幾度朔邊秋已道禪
心靜寧增客思不大師勤囑累賤子却夷猶玉悔荆

人獻金疑直氏偷掇蜂方見惑飼虎遂蒙尤異域山
千疊孤生海一漚逝將歸法喜愧未息紛糾玉塞哀
淹泊珠林乞庇庥津梁疲燕雀身世感蜉蝣願托傳
衣侶從公問白牛

送人從軍

刁斗聚巖城高旗出五營雪開金帳色沙亂鐵衣聲
磧斷山迴合軍孤戰死生開邊天子意何敢怨長征

贈秦州李生

從征老羗有功不敘

挽强天水客結髮屬幽并獨負雙鞬勇長隨五校營
功遺畫麟閣力盡戰龍城惆悵甘延壽平戎賞不行
陪諸公飲巴大將軍宅

佳興南樓月正新森沈西第夜留賓
圍爐捲幔初飛雪擊劍行杯不起塵
四座衣冠誰揖客一時叅佐盡文人
褐衣久已慙珠履不敢狂歌吐錦茵

送人之羗突里兼柬陳子

朔風邊騎逝駸駸落日沙場送客心
負羽久從關外戍吹笳空怨隴頭吟
銅龍塞迥雲陰斷有銅龍長數尺許形模怪

偉觀卧江上土人祀以爲神石馬山寒雪片深
幕下只今誰健筆飄零不復問陳琳

讀張坦公先生所撰徵音集却贈

一編遺事淚潺湲
變徵聲中慘客顏
轉戰幽并軍縞素
側身梁楚路間關
丘墟敢咎王夷甫
詞賦空哀庾

子山惆悵白頭荒徼客龍胡當日杳難攀

張坦公先生談甲申歲河北討賊之事感賦

風塵銅馬帝城昏痛哭孤臣出薊門俠客漢陽藏季
布義旗河朔奉劉琨烏號異代徒餘恨龍戰當時豈
報恩赤社旣移終不復空憐心計盡中原賊購公急
賴張蔡二
俠士
以免

訓陳子長七夕見懷

毳幙寒生聽雁過一尊遙夜恨如何空憐令節催愁
切無那窮荒惜別多笛裏風霜哀朔塞橋邊機杼望
明河淒淒白露松花水千里相思只浩歌

浚稽曲

浚稽山色青崔嵬翠蓋香輪夾道開天畔銀河公主
第邊頭金帳單于臺烏孫千馬親呈聘鸞雛九女爭
來勝舊匹由來締賀蘭和親詎是因婁敬築館王庭
奉義成葳蕤綠綬耀丹纓自有威儀尊鳳女特分湯
沐在龍城蛩蛩氍毹幕開行殿紫駝白豹窮歡宴金筵
激調劣吹簫珠帽流光罷遮扇從官新給羽林郎挾
彈鳴鞭繡轂傍旌飄蘭葉銀平脫馬簇桃花錦襦襜
射生女騎何輕利翠羽紅妝映天地窄袖鴉青綬北
珠輕韉鳴綠裝西屬羌管秦箏晝夜喧貂袍三襲不
知溫自矜帝子金鄉貴不羨名王玉塞尊名王舊是
呼韓裔尚主中朝稱愛壻好獵頻徵鳴鏑兒酣歌偏

惜琵琶伎琵琶小伎珊瑚唇歌舞朝朝粉態新祭馬
每陪青海月射鵰常從雪山雲可敦嬌妒還猜忍同
昌無復犀蠟忿帳下纔驚一騎來杯中已見雙蛾殞
短轅不子恨驅牛腸斷狂夫淚莫收自甘髣面哀紅
袖不念同心歎白頭荆棘滿懷相決絕雙垂玉筍霑
襟血龍種寧同葱薤捐燕飛欲作東西別妾意君情
各自流鴛鴦文綵掩袞裯却分蕃部西樓去別是秋
風北渚愁黃沙深磧連天色可憐相望誰相憶千里
金河怨別離經年銀漢無消息八月穹廬白雪高玉
花寒枕夢魂勞販珠何處求朱仲綠幘寧聞侍館陶
海西沙門術何秘白馬迎來布金地畏吾字譯貝多

經龜茲樂奏蓮花偈灼爍禪燈著曙明仙梵風飄夜
夜聲黃鵠歌中思故國青鴛塔畔懺他生妝殿何心
理殘黛空王貶禮應憔悴已分猜嫌任狡童誰憐調
護勞諸妹弱妹盈盈隔瀚源黃雲千騎擁朱軒判翼
每嗟鸞鳳侶回腸偏繫鵲鴿原錦車銀磧何迢遞姊
弟相逢自銜涕爲嘆姮娥奔月來却教須女驂星至
相勸殷勤向玉真莫將濁水怨清塵苦辛應憶回心
院嬾婉須諧結髮人故人歡愛今從始五色羅襦織
連理重畫修蛾待粉侯休吹別鳳悲簫史願作流蘇
結不開屠蘇雙勸合歡杯五部大人齊入賀萬年公
主竟歸來從此歡娛莫相棄上如青天下如地入貢

還修子婿恩降嬪莫負先朝意伊昔先朝草昧年旌
旗北望阻柔然欲將玉女傾城色遠靖金戈絕塞天
絕塞西來平若水三朝屢訂施襟禮異錦葡萄出帝
家名駒苜蓿通邊市今上彌敦兄弟歡迎歸旌節
徧長安龍首貴宮中綺宴螭頭中禁並雕鞍千秋天
屬恩寧歌賜予年年下雙闕沁水園中謠吹塵祁連
山下璿瑜月璿瑜寶幄映重重貴主繁華樂未窮莫
道芳菲邊塞少春風弄玉在樓中

上巳奉陪都統安公遊飲西山十韻

假日雕鞍出乘春綺饌開相要藉草去不見乘蘭來
五法元戎旆三重土巳杯倚弓憑絕嶂吹笛俯高臺

野入蒼茫迥江連睥睨迴關山消白雪城闕鬱黃埃
愴怳餘寒在踟躕落景催殊方還令節久客且娛哀
共識分符貴徒慙入幕才公如寬禮數長願忝遊陪

贈陳生昭令

軟裘修帶日翩翩管記風流擅朔邊趨府直登蘭綺
內賦詩時向射堂前陳琳筆健元名士丁掾才多自
少年譯罷石經還躍馬秋鵬原上試鳴弦昭令善國書

又

弱年憐汝帶陰關回首南雲涕泗間每向詩書聞漢

語

作漢語者惟吾儕數人耳

漫從圖畫識閩山

昭令閩人

黃衫舊侶空

漂泊皂帽高人自往還猶有荔支鄉思在時時歸向

夢中攀

同林生夜宿淨公房時林來自咸鏡

八月霜清塞草枯
上方十里接平蕪
客來海右譚玄菟
僧本江東記赤烏
幽咽蘆笳秋磧遠
蕭條蘭若雪峯孤
夜深月出聞清梵
不信天涯有戰圖

送人還蒙古

松花江水寒如練
七月吹霜滿郊甸
行子三秋初憶歸
邊頭萬里今無戰
君家部曲海西涯
此去王庭路正賒
駝首山長通碎葉
龍鱗川盡出流沙
流沙天北征途絕
陰磧荒荒欲飛雪
馬色秋開氍毹帳
雲雁聲曉落金笳
月黃貉之裘青兕
韉具裝結束去翩翩射生

知爾誇身手好佩驛弓事右賢

冬夜伍謀公齋同錢德惟作十韻

人間塵事屏溪晚
簾門幽笑共披裘
侶言尋秉燭遊
倚欄霜乍濕捲幔月初流
燐火遙穿徑川冰迥映樓
玉繩寒歷歷銀箭夜悠悠
佳設逢羊曼清詩得隱侯
未能依白社空自夢滄洲
澹淡河如瀉崢嶸歲欲遒
嘯歌行寄傲情話坐忘憂
寂寂烏皮几橫琴共爾留

同陳昭令過西山蘭若十韻

禪房新雨後步履暮山中
落日精藍好遙烟積翠濛
枳籬崖半繞蘿磴逕微通
汀樹收殘暑山鐘落晚風
樓開鳬渚北人到虎溪東
虛牖飛珠瀑迴闌避石叢

藤陰簾捲入嵐氣坐來空作佛慚靈運安禪問朗公
幽期那可負佳趣偶然同月出緣溪去山山聞候蟲
與友人夜飲却贈

玉靶雕弓鉄袴襠從軍曾拜漢中郎未封燕領家先
破纔識龍顏國已亡終古恨深銀海月餘生夢老玉
關霜南朝舊事休回首濁酒明燈泣數行

送金譯使之朝鮮

眞番天外與華同走馬看君使事雄獲菟鑿關通極
北句驪負海出安東魚鹽肯給邊人費冠服偏存漢
代風莫道好文矜此地尙煩重譯衛王宮

平壤有衛滿故宮

贈陳蓉旬

白石蒼苔小徑春飄飄野服淨無塵知君名在遺民社愛著陶家漉酒巾

又

無諸臺畔霸圖分幕府曾傳轉餉勲莫話永嘉南渡事邊頭誰識舊參軍

又

石上丹經小篆文求仙早事紫陽君螢芝採罷心無事獨倚青崖看白雲

再贈孔公

賓人昔下牂牁東雙韃騎象君最雄收兵屢出銅柱外分麾欲建珠崖功白骨吁嗟徧原野百戰誰能留

漢社一夜軍聲散鉄橋三年王氣收金馬間道崎嶇
西洱濱橫刀猶護屬車塵王孫無復餘三戶從者誰
憐只五人海水浸天不能渡辭君淚盡烏蠻路天邊
何處托玉琳市上空傳哭纔布漢祖由來赦吠堯投
荒恩重頌興朝夢繞朱鳶鄉國遠路迷玄菟塞雲遙
南冠憔悴何人識賣舂時時向城陌壯節寧看羶乳
時締期敢憶烏頭白盡日蓬蒿坐掩門縞衣猶記舊
時恩何當更化蘇耽鶴萬里常依蜀帝魂

長白山

長白雄東北嵯峨俯塞州迥臨滄海曙獨峙大荒秋
白雪橫千嶂青天瀉二流登封如可作應待翠華遊

上京

城臨馬耳河在寧古塔鎮城西南七十里三殿基址皆在殿前有大石臺國學碑猶存數十字有天會年號禁城外有蓮花石塔微向東歛石佛高二丈許在北塔之

完顏昔日開基處零落荒城對碧流
赭馬久迷征戰地黃龍曾作帝王州
荒碑臺殿邊陰暮殘碣河山海
氣秋寂寞霸圖誰更問哀笳處處起人愁
金太祖破馬先行徑渡混同江水止及馬腹既濟使人測之其深無底焉

擬唐人謝真人仙駕過舊山

真人冲舉後遺跡在青山
雲壑何年別鸞輪此日還
鸞歌去天上鶴語問人間
殘甃丹猶伏虛壇草自斑
徒悲蓬海變獨對翠峰閒
寄謝區中客驂螭詎可攀

送人之平遠

朝鮮屬道

沃沮南繞沮江遙雪棧霜林下使輶屬國敢愁征調
急行人應喜戰烟消麒麟石在山侵塞魚驚梁開海
接遼誰道扶桑天外地兵威猶自話唐朝

朝鮮人相傳天降麒麟

麟馬以迎朱蒙王王躍石而上遂乘之以升天今平壤府東門外有麒麟石

王昭君

昭君巫峽女奉帚玉階下徒自恃傾城翻令悲遠嫁
前殿辭君去不還龍堆空望漢關山愁霑朔雪摧珠
袖淚入邊雲損玉顏玉顏明鏡看銷歇夢到深宮轉
淒咽下陳曾未識君王絕國何堪捐賤妾夜夜毚穹
青海隅月明非復舊金鋪不知甲帳承恩者曾有蛾

眉勝妾無

夜宿

獨宿但清夜，淒其戍角長。
營開千帳月，城壓萬山霜。
我夢還魚鳥，心合虎狼。
莫將疇昔意，歲晚怨龍荒。

沙林同友人登完顏故臺

廢磴盤紆嶺，色迴與君登。
眺暫顏開單，車絕塞雙蓬。
鬢落日清秋，萬古臺蕃劍。
擊殘歌自苦，吳簫吹徧調。
偏哀最憐酒，半凭闌處蕭瑟。
江山只雁來。

會寧道中有古墟墓賦此弔之

落日孤鞍古戍邊，殘碑下馬拂寒烟。
獨來玉劍埋魂地，愁聽金笳薄暮天。
搖落關山龍戰後，蕭條城郭鶴

歸年祁連起塚凋殘盡荒外何人尙夜泉

送巴參領之挈洛

吹角鳴笳徹野聞碧油麾盡儼星分
詔書特徙真珠部使節先馳浴鉄羣路繞黑江三丈雪天圍白道
萬山雲奚車霽騎三千帳檄到爭看屬護軍

三月十二日河上口號

三月歸鴻滿塞天流澌日暮尙淒然自從身逐烏龍
戍不識春風二十年

奉贈封山使侍中對公

翩翩貝帶御香衣幾載承恩在紫微銜
詔暫從雙鳳出奉車還傍六龍飛彤墀日月開仙仗白岳

雲霞護帝畿應是臣心長戀闕夢魂頻向禁垣歸

贈滇令巴郡葉明德

回首岷峨限百蠻羈離十載出兵間
誰玄頭髮傷心白杜宇鄉園戰血殷
數口幸逃銅馬賊一官空到碧雞山
益州耆舊今餘幾簾肆淒涼老未還

又

錦城山色接昆明猿鳥聲中戰鼓鳴
自著白衣來間道却垂黃綬逐行營
崎嶇虎口心猶折慟哭龍髯氣未平
今夕一樽重話舊瘴雲蠻樹不勝情

又

閱盡干戈復塞門完顏臺畔戍烟昏
家沈浩劫疑兵

解君族姓十口皆死千賊免者惟同產二人及妻子而已身歷窮荒識主恩
乞活漫傷遷客賤寄書猶喜故人存穹廬風雪天涯
夢腸斷已猿挹淚痕

又

滄波一曲繞溪新移柳栽松托隱淪王烈自成邊處
士嚴遵元是蜀遺民鵝冠送客風簾晚濁酒看山雪
磴春共道餘生疲戰伐杖藜聊復憇邊城

詠鷹

徵鷹使者貢君座上作

玉爪凝殘雪金眸映落暉可憐沙塞翮欲傍翠華飛
奉贈大將軍巴公

珠旗錦繖照吳鉤玉腕花驄金絡頭玄塞舊傳朱鷺

曲彤庭新賜紫貂裘
磧開萬幕邊聲合
境拓雙城戰氣收
欲畫南宮誰第一
功高獨有冠軍侯

奉贈副帥薩公

時專鎮寧古

彤墀詔下拜輕車
千里雄藩獨建牙
共道伏波能許國
應知驃騎不爲家
星門晝靜無烽火
雪海風清有戍笳
獨臂秋鷹飛鞚出
指撝萬馬獵平沙

蘭虎

追和梅村夫子

薰風妝閣問鍼神
五日符懸辟厭新
不見赤刀傳粵咒
還從綵勝識雄寅
黃衣綴就金仍蹙
白額描來繡未真
莫訝使君能化虎
蘭絲元是負嵎身

鯨鶴

玲瓏玉骨倚風疎，莫向綸竿怨豫且。散雪豈能侔皎
鶴，凌雲何意起枯魚。身餘刀俎腥猶在，寵待軒墀翅
自舒。誰道波臣非羽駕，琴高赤鯉亦騰虛。

蟬猴

自許孤高飲露盤，求林誰作野賓看。只憐風外吟枝
穩，那識雲邊嘯侶寒。無口詎需巴客淚，有綏宜著楚
人冠。君身可是孫供奉，一賜金貂認欲難。

贈陳昭令

葉葉紫貂衣，秋風錦鞵飛。長圍不肯入，獨臂海青歸。

又

欲逐狐蹤去，回鞭萬仞岡。笑攜雙白羽，射殺兩青狼。

觀獵贈陳昭令

颯颯旌竿雪未休，弓聲霹靂徧林丘。
馬嘶秋草搖珠勒，鵬掠寒雲下錦韉。
挾彈自矜文士健，揮鞭不逐漢兒遊。
少年樂事南山獵，誰羨家聲曲逆侯。

獵後再贈昭令

金笳馬上北風哀，獵罷爭傳鸚鵡杯。
愛射黃羊重插羽，欲呼蒼隼却登臺。
邊雲壓地霜旌捲，營火連山雪帳開。
明日沙林還逐兔，酒酣更起刷龍媒。

都統郎公奉使塞外賦此奉贈

清秋驛路淨氛埃，落日鳴笳使者來。
早拜千牛陪鳳輦，新驅駟馬出龍堆。
旌飛楊柳城陰晚，帳擁芙蓉劍

色開多少冰天遷客淚待君歸奏建章臺

又

柘弓斜月綠弦鳴珠服如星照玉纓穿禁久分中貴
寵趨朝爭識小侯名每調生馬期門出獨輕鵬傍
輦行知爾羽林誇健手肯教馳射數邊城

送人之鴉青江

蘆管淒涼鴻雁天北風空磧暮蒼然鴉青江畔重移
帳回首沙場又十年

送陳昭令之兀喇十韻

野館驪歌咽晴郊騎置行悽心看往路屈指問嚴程
曉帳毳牆重春衣錦帶輕雲峯馬上出雪澗鳥邊明

林閭貂餘跡江空雁度聲年光寒食近邊色旅愁盈
楊葉遙分塞松花曲抱城寧同隴頭別早擅幕中名
露布推書記風流想步兵不知驚坐客何似棄繻生
春暮江上凍解同諸君放舟至白崖口賦示

十韻

鼎鼎流澌盡悠悠放艇孤驚心惟節序遊目且江湖
鳬雁光初汎魚龍氣欲蘇青春生水際丹景豁天隅
瀨淺聽偏響波平望或無不知風帆駛帆一作去聲
杜詩浦帆晨
初發祇訝雪峯趨旅眺還增嘆江謳亦自娛人應尋弋
釣家本在菰蘆浩蕩滄洲思艱危絕塞軀莫令悲負
羽從此問乘桴

奉寄安大將軍二十韻

同錢德惟作公以寧古副帥權鎮奉天

今日須頗牧維公翊禹湯九重頒虎節萬里拜龍驤
自北雄天府居東本帝鄉官因留守重才是折衝
長銅獸中軍法金貂襲御香權兼趙京兆威著杜
常陽開幕珠旗月行邊鐵騎霜令嚴師自肅政簡物
皆康坐運中黃策行消太白芒士心依大樹海氣淨
扶桑舊內虛鵠鵲新城扼鳳凰鳳凰城在鴨綠江上遼之南境也
直令三輔謐那用五兵張營有蔓菁種車無薏苡裝
每嗤卿食雁不入馬如羊澆俗潛應改仁風邈已翔
丹青應早畫赤白途空曩藉甚功書竹懷哉淚染裳
寇君寧復借買父吹難忘途遠重關外心悽昔座傍

揖容長孺倨哭恕嗣宗狂一別頻玄燕千山限白狼
尙思乘月嘯久罷卷波觴衣敝鶉雙挽書騰雁幾行
報恩腮未曝述德臆偏傷窮鳥哀元淑無魚憶孟嘗
何時射柳騎重過浣花堂公望方調鼎子生且賣漿
沛宮雲正紫遼隧草初黃努力登三事從容靖四方
誰知擊壤代有客慟龍荒

寄顧梁汾舍人三十韻

昔歲家吳會諸公問越盟逢君髮未燥入座目俱成
倒屣才名早披襟意氣傾高文何粲粲雅論各觥觥
攜手慚連璧同心喜報瓊時邀山館醉每愛水樓晴
夜月寒珠箔春風做繡楹花迴青翰小柳繫綠駿輕

麗曲能調管新詩卽譜箏漏隨銅史促杯爲玉人擎
但任嵇生誕那知許邵評譽方推二妙語不數三明
往事星霜改新愁關塞紫子悲玄朔橘汝謝赤墀櫻
老去餘華髮書來自素誠恨恨詢謫戍欸欸話平生
跪讀烹魚字悲吟別鵠聲風流如在眼雨泣颯綠纓
末契嗟何托良儔歎莫并栖遲成北叟浩蕩寄東瀛
暮齒家何在窮荒歲屢更將同溫序夢幸似宋人盲

軍府以子短視特免田租

世事隨殊俗生涯共老儕鸞龍徒奮采

鷓鴣恐先鳴漫說逢楊意

前歲侍中對公以子長白山詩賦進

呈偏難

召少卿舊遊憐轉燭今賤愴聞笙舞鶴鄺邊水和龍

塞外城三秋空漠漠萬里獨怛怛道遠懷瓊樹宵長

望玉衡如蒙子公力終到漢西京

雜感

甌脫蕭條塞路微
阿疎城畔柳依依
邊開駝鹿山初鑿
江到牛魚嶺漸稀
戰士中宵看堠火
米船六月寄征衣
冰霜今歲寒應早
屈指諸軍解甲歸

部至七月中河冰將合乃歸

又

娥娥紅粉映邊霜
細馬豐貂滿路光
朱幕漫傳翁主號
黃眉爭識內家妝
空憐拂鏡凝花態
莫爲無禪笑粉郎
千載奉春遺策在
玉顏那更怨龍荒

時以婦女賜海東諸

首領邊人謬以皇姑稱之其俗男女皆不着禪

又

秋風吹磧起鳴鵑磧路西迴限二遼鴉鵲廢關仍抱塞鴛鴦殘灤不通潮千年城闕人誰識百戰河山世已遙窮微可憐無故老難將遺碣認前朝

讀古人詩有感

山川滿目恨滄桑撫舊悲歌淚幾行翟義豈能有漢祚貫高原不負張王朱鳶別後非吾主白馬歸時是國殤寂寞天涯今夜月大招何處問瀟湘

混同江

混同江水白山來千里奔流晝夜雷襟帶北庭穿磧下動搖東極蹴天迴部餘石砮雄風在地是金源霸

業開欲問魚頭高
讌處蕭條遺堞暮潮哀

擬唐人御溝新柳

春光開上路柳色吐韶年
掩映金溝遠參差玉道連
倚風條尙細覆水影初圓
輕翠銷宮雪微黃嫋禁烟
畫眉空自好學舞欲呈妍
尙得承攀折依依翠輦前

贈陳蓉旬十韻

昔爾採玄籙尋真向赤城
已窺三景秘欲掩八公名
家本陳安世師逢寶子明
顏依金竈駐身度玉壺輕
翠水餐霞住鴻天馭月行
問年枝不汗卻老樹驚精
方術誰同傳仙才自屬卿
好將山石煮莫歎海塵生
去去憑鰈杖寥寥度鳳笙
洪厓如可拍直欲上瑤京

利斧後集卷之二
郎公將還京師賦此奉送

西風吹雁滿關山，愁見蕭蕭四牡還。
橫笛清秋紫客恨，衰楊明日爲君攀。
紫臺霜露催征騎，丹闕星河曉曙班。
極目長安天際遠，離心空望五雲間。

奉酬徐健庵見贈之作次原韻

金燈簾幙欸清關，把臂翻疑夢寐間。
一去塞垣空別淚，重來京洛是衰顏。
脫驂深愧胥靡贖，裂帛誰憐屬國還。
酒半却嗟行戍日，鴉青江畔度潺湲。

集成侍中客若齋賦得柳毅傳書圖次俞大文韻

落日金羈上客過，畫簾燈火九微多。
當筵誰共抽毫

素一幅吳綃夢楚波

其二

鮫館龍堂素練光停杯與爾話錢塘玉顏自昔多憔悴莫向涇陽怨小郎

其三

年年沙朔掩蒿萊橘社包山夢屢回

吳中洞庭山今亦有柳毅井

日雨工圖上見却憐儂亦牧羊來

其四

洞庭雲氣曉憑憑寫入銀屏照錦燈惆悵紅妝千萬
際江關何處問巴陵

春夜聞絃索

限琴字

星轉天街玉漏沈何人中夜撥胡琴不須更奏伊州
曲說着邊關已濕襟

咏史

豈是騷人怨難忘舊國恩蕭條湘水上誰弔楚臣魂

月夜

月華深夜下金波綺榭沈沈露彩多極目天邊雙桂
樹清輝萬里共婆娑

秋笳集雜著卷八

吳江吳兆騫漢槎著

表

擬久旱禱雨 天壇甘霖協應賀表

序

方與三其旋堂詩集序 孫赤崖詩序

慎交二集

書

戊午二月十一日寄顧舍人書

與計甫草書

又

秋笳集雜著卷八

吳江吳兆騫漢槎著

表

擬久旱禱雨 天壇甘霖協應賀表

伏以 龍旂風細九霄沛 天子之恩 翠蓋雲迴
萬國仰 聖人之澤蒼后飛泉以界道早徧春疇青
鬃懸水以行空爰滋曉陌慶已通于霄路懽遂洽于
坤輿 臣等云 竊惟桑林致禱殷宗自薦于犧牲雲
漢稱歌周王用罄其圭璧啓泰山之玉檢漢號乾封
帶嵩岳之金霞晉當泰始隴西女子產旱母而驚心
河北神人降火光而駭目慨赤衣之司令致罍蜩之

不來泥人矯掌于中庭實文人之誦語土龍驟首于
元寺亦茂宰之矯誣眺山上之金蛇何時布影望臺
邊之玉女幾日披衣空駐問于綠蓑漫吞聲于赤炬
豈東海有銜冤之婦乃旱三年使南山有戴笠之夫
偏傷六月茫茫青畝難逢渭水之牧羊滌滌黃輿不
見湘川之飛燕未有厯慮彤廷潤土膏于一旦誠迴
蒼極布觸石于三吳如今日者也

云

蒼龍啓瑞

碧鳳承符

功已邁于大風

祥自呈乎甘露

鴛鴦

驚殿裏玉階敷三秀之華鳩鵲樓中珠綴結五雲之
氣偶以天心之微戒遂煩帝念之焦勞九重綈
几悉陳鄭俠之圖三殿瑤封盡繪幽風之什爰命

屬車而啓路乃臨郊殿而祈 天隊簇桃花步青塵
而不動旌開蘭葉溯淑氣而悠揚陋漢代之祈年非
關民事笑唐家之昭應豈謂田功 翠華方賁于甘
泉蒼璧已通乎 帝座于是封姨嘯樹豐隆啓塗灑
潤齊城豈俟樂巴之酒森寒石礎已同張協之詩涇
陽雨工對良疇而降澤華山肥蠶見和氣而全消山
川悉載其恩膏禾黍並除其螟螣臣等術謝檄風人
非作雨幸際攀鱗之會謬居拜手之儔慕刺史之丰
裁隨車致雨思學士之文采志喜名亭况屬 天地
之交孚益快神人之篤慶有心浴日敢效歌風伏願
勤咨國計 軫念民依 未央夜月聽虬箭而傲

心上苑春風覩雉媒而動色奠元圭于水土之後
揮朱紘于宵旰之中則麥秀三岐誦聖主無疆之
福禾呈九穗拜君王有道之祥矣

序

方與三其旋堂詩集序

僕聞長雲接塞將軍傳龍雀之悲細雨滴簾客子下
鷓鴣之淚山舍秋氣寫幽恨于銀虬水咽春聲托邊
情于金雁番禺南望柳花之絮無多張掖西來蓼子
之根已少由來才士半泣飄蓬自古羈人偏多篇翰
論輸左校曾聞楚石之談編管營州亦有隨珠之嘆
撫長松而掩袂攬橫竹而登車一曲龍吟因思公子

數聲魚沫爲憶家山中土漂搖尙含毫而緘怨客堂
離別猶援牘以杼哀況乎絕塞長征殊方遠戍竄景
真于關外逐亭伯于遼東南雁無憑北梁已遠白狼
堆外畏懸度之難行黃鵠歌中怨關河之甚渺已作
竊停之種能無侘傺之辭是以毛光祿之在赫連自
述降羌之痛李都尉之居朔野亦流望漢之歌豈獨
越石悲吟淚盡扶風之馬子初雜曲心摧郢水之魚
已哉方子與三才爲藝苑之宗名在儁流之右庾子
山之文采父子無慚劉孝綽之才情弟兄兼擅方翔
勁羽忽中長置坐京兆之全家嶺頭齋窳爲李豐之
同產隴外俱投慷慨辭家淒其出塞地經絕脈向天

畔而何之水號斷腸上隴頭而嗚咽紇于落月故園
之夢空歸勅勒浮雲異域之程何極拂廬夜靜能不
椎心服匿晨持每看沾臆邊霜似雪蕭條鏤磧之聲
塞草如煙淒咽金笳之韻曲中風土自操南音笛裏
關山空吹北部於是開繪寫怨流翰陳絃客路山川
塞天風雪或車中之贈別或馬上之行吟以至真番
土風鮮卑國語無不調成金石麗錯瓊瑤名曰其旋
都爲一集寄羈臣之幽憤寫逐客之飄踪怨入琵琶
隕烏孫之涕淚哀傳刁斗感雁臣之苦辛允爲傳世
之篇聊當述征之作僕三年久戍萬里無家掩泣江
頭已同女子銜啼帳外幾類官奴幸並謫之逢君遂

同衣之容汝相携塞表似長羅之共蘇卿羈旅關中
等子淵之憐沈炯凡茲華製半屬分題爰贅語于簡
端志悲懷于塵末庶使咸陽城畔人傳山水之謠廣
武亭邊客記落花之賦云爾

孫赤崖詩序

蓋聞纏綿湘吹以去故而增悽慷慨燕歌由送離而
結歎是以舊山既遠促管流音異國無歸繁絃繁臆
房陵一去君王有山木之謳軍府長羈伶官有土風
之操執珪懷越尙藉悲吟公子留秦亦傳哀唱由來
志士遭此窮途未有不憑柔翰以消憂托長歌而申
恨者也况夫金河轉徙銀磧羈孤水千里而斷腸塞

萬重而絕脈陳子公戍邊不返空望長安杉中監還
漢何年傷心遙海慨其嘆矣能不漣而孫子赤崖弱
年擢秀盛齒知名才爲談士之宗人擅藝林之俊江
東二陸共識清河鄴下雙丁先推敬禮乃以拾塵之
惑遽從棲火之嗟靈璫難陳遐陬遂謫飄零皂帽遼
海空來襦褌素衣吳關長謝土思迢遞托黃鵠以俱
飛客夢徘徊指白狼而難越然而蘭山箭盡篇什偏
工桃館尊空風流未沫劉越石栖遑于河朔詩體清
剛庾子山留滯于關中賦才宏麗雖丁年坐老而子
夜堪歌于是娛志縹緲寄情嘯咏登高摘藻攬物揚
葩紫雲亭堠興乘障之悲思白雪關山激從軍之壯

志寒鴉睇野夕雁橫天怨起衣單魂銷筰脆氣沉雄
而莫展心侘傺以誰知及夫臺上瞻鄉山頭送遠鶴
鴈不見鸞酌徒傾睠花月於曩遊愴風霜于今別莫
不播之淒響緯以妍辭發言而瓊樹相華命調而銀
箏並咽捲蘆清吹譜爲蔡女之文截竹哀音綴成丘
仲之曲豈徒伯鸞南邁惟聞五噫中郎北遷願成十
志也哉僕舊托攀嵇近同遷賈黃墟遊讌久限山河
紫塞軍僑更分鄉縣攬淚痕于河上空訴篴篥鬱愁
氣於車前寧消梧酒北部之貧已甚南館之會徒乖
永念生平彌嗟弦括却題短引爰寄沈悲嗚呼蘭忌
當門痛煩冤之何已蓬悲出塞憐飄寄之安窮西氣

驚商將聽君詩而隕涕北風干呂誰披余製而傷神乎

慎交二集

蓋聞盧郎八米雅重南朝魏氏雙珠見推北海江頭
折柳遺班筦於名流石上看松飛羽觴于公子若夫
攜履蒼龍之闥早識安豐迴車朱雀之航爭觀孝綽
並以盛年馳譽弱歲知名白裕文人烏衣貴選張廣
武珣車之日步兵嘆其奇才王山陰總髮之年僕射
驚其明慧是知英華靡絕端藉羣賢領袖將來還歸
吾黨爰集邑中之秀以追河裏之遊客盡懷珠座同
割炙少長咸集方典午之蘭亭調賦無雙擬睢陽之

鶴渚布蕙肴而肅駕願荷衣以過從

書

戊午二月十一日寄顧舍人書

別我華峯二十餘年矣江臯塞表超忽萬里每一懷
思淒泣彌日昨歲三月得華峯丙辰臘杪所惠札并
見懷二闕頃初二日復從驛使得四月望日札及彈
指集綢繆之思溢于毫素出入懷袖如見故人午未
之交知兄宦遊京邑遙爲雀躍弟時苦徭役未遑緘
寄至于解組南轅則天涯遊子邈若夢中嗟乎我兩
人契托正復何等越禽代馬各在一方僅從一紙音
書敘廿年離索人生到此能不淒涼弟朔漠羈踪兄

定未曉今畧書梗概俾兄知之弟以巳亥夏出榆關
抵瀋水之陽海昌相公欲留弟共居一年瀋帥不許
瀕行時其令子子長贈我車馬衣裘六月廿一渡松
花江時暑甚因浴于江遂得寒疾著氈衣騎馬行大
雨中委頓欲絕抵大烏稽送吏以弟垂篤特憇三日
同行者皆謂不起忽夢準提而愈七月十一至戍所
戍主以禮見待授一椽于紅旗中舊遷客三四公皆
意氣激昂六博圍棋放歌縱酒頗有友朋之樂然一
身飄寄囊空半文賴許總戎康侯孫給諫汝賢解衣
推食得免饑寒癸卯春弟婦來携二三婢僕併小有
資斧因以稍給甲辰春幕府以老羗之警治師東伐

令流人強壯者供役軍中文弱者歲以六金代役於是石濠村吏時聞怒呼無昔日之優游矣乙巳以授徒自給其夏張坦公先生集秣陵姚琢之茗中錢虞仲方叔丹季兄弟吾邑錢德維及鄙人爲七子之會分題角韻月凡三集窮愁中亦饒有佳況其後以戌役分携此會遂罷戊申蒙恩紳袍特許優復弟遂得爲塞外散人寧古自辰已後商販大集南方珍貨十備六七街肆充溢車騎照耀絕非昔年陋劣光景流人之善賈者皆販鬻參貂累金千百或有不盈數千者惟吾儕數子以不善會計日益潦倒然弟亦不能棄捐筆墨與酒削賣漿逐錐刀之利短褐藜羹任之而

已庚戌諸徒皆散而歲復旱霜米石千金副帥安公
雅重文士憐弟之貧以米相餉而合肥先生及對溪
玉峯復有見貽於是翳桑餓人幸免溝壑癸丑大帥
之子相從授經館餐豐渥旅愁爲解丙辰春大帥移
鎮元喇遂失此館然執經者亦不乏人所以僅供薪
水耳弟年來搖落特甚雙髻漸星婦復多病一男兩
女薇藿不充回念老母煢然在堂迢遞關河歸省無
日雖欲自慰祇益悲辛課徒之下間有吟咏正如哀
雁寒蟬自鳴愁恨安敢與六代三唐競其優劣哉前
歲原一札來索鄙製云欲刊布弟深感其意特寫致
之可三百餘篇塞外之亂蒼黃中失五古七絕二種

悵惜殊甚今當再抄一冊于四五月間寄覽彈指集
如靈和楊柳韶情堪憐又如衛洗馬言愁令人憔悴
兄筆墨如此少遊美成更當何處生活別兄二十年
對此如重觀風流弟出塞時未携詞譜今得此集便
當按調爲之正恐壽陵之步未易相學耳弟悲怨之
深雖三峽猿聲隴頭流水不足比我嗚咽穹廬愁坐
極目蕭條夏簟冬釭淚痕潛拭安得知我憐我如華
峯者與之促席連牀一傾憤臆乎弟患難之交陳子
長最篤但隔在遼海不得相見此君風流文采不減
華峯意氣亦復相類惜其無命流落而死爲之痛心
龍眠父子與弟同謫三年情好殷摯談詩論史每至

夜分自彼南還塞垣爲之寂寞錢德維議論雄肆詩
格蒼老山陰楊友聲鐵面虬髯而詩甚清麗茗中三
錢才筆特妙不意大者有山陽之痛而小者復爲濮
陽之匿姚琢之詩如春林翡翠時炫采色陽羨陳衡
玉善諧笑工圍棋亦嫺秀可喜弟時與之奕今弟之
棋視丙申五月在澄江與華峯賭局時可高六七子
許張坦公先生河朔英靈而有江左風味雁羣與弟
情致特深唱訓亦富未歿前數日卽屬弟在其榻前
作行狀人琴之悲至今猶哽敝門人閩中陳昭令名
光啓秀而嗜學北州少年此爲之冠與弟居止接近
擁爐啜茗靡夕不共也此皆弟塞外文章之友因兄

垂訊聊復及之前者婚約爲李姨所阻深用悵歎承
復有幼女之約極荷雅意果得生還則我女兄之子
婦也又何他云嗟乎此杜南飛此身北滯夜闌秉燭
恐遂無期惟願尺素時通以當把臂唱酬萬里敢墜
斯言震修兄弟近況何如念之殊切凡我舊好幸俱
致相思南望雲山可勝淒咽塞鴻殊便無忘德音

與計甫草書

三年執別萬里傷離故國音塵殊方羈竄飄踪如線
惓惓何言塞外苦寒四時冰雪陶陶孟夏猶著弊裘
身是南人何能堪此每當寫廬夜起服匿晨持鳴鐃
呼風哀笳帶雪蕭條一望泣下沾衣嗟乎故人應爲

悽咽弟自出塞以來萬端都謝如泥中花蒂無復芳
菲而懷友之思未嘗棄懷每憶曩年游好輒便傷心
邯鄲宮人嫁身廝養而春花秋月尙夢深宮區區鄙
懷庶同此耳昨歲冬至巴公入都曾勒長札并排律
三十韻奉寄兩兄而此緘竟屬浮沈可爲悵惘龍荒
絕遠非人所居夙昔知交音問殆絕謫此三年止得
公肅舊冬一札耳少陵云親朋滿天地兵甲少來書
諷咏此詩益增我勞結弟久沈異域語言習俗漸染
邊風大雅惜情磨滅盡矣方欲控弦試馬作健兒身
手何堪尙與青雲故人論疇曩之誼述詩文之樂乎
高堂白髮幸邀浩蕩得還里門弟雖滯冰天亦當不

恨若得雞竿再下早賦刀環召李白子夜郎還蔡邕
于朔野葛巾野服返迹丘園與我兩兄促坐言哀銜
杯道故此亦再世之樂也

嗣皇在御才士畢升

努力良時勿以故人爲念老伯暨老伯母應俱萬福
茲因程年兄歸南勒此布心相思之深非筆所悉遙
瞻南斗涕泗何云

又

離別三年關山萬里冰天凜冽積雪嵯峨索處穹廬
軫憂終日遙思我友勞佇如何昨年遘難吾兄屢顧
我若盧之中銜涕摧心慰藉倍至等公孫之奔走似
用叔之周旋愧荷深情猶在心骨廣陵佛舍向與疇

老杯酒終宵班荆笑語何圖此別遂隔死生永念曩
游寸腸欲裂弟形殘名辱爲時僇人垂白衰親盛年
昆季吁嗟何罪相率播遷旣無子幼箕豆之辭而有
文淵薏苡之痛已同崔駟遼海之竄而復坐李豐隴
上之條生世不辰遭此奇酷身流絕域名入丹書雖
視息猶存而已同枯骨每一念及忽不欲生向在故
鄉意氣豪上嘗歎庾子山沈初明以如許才筆羈旅
殊方雖篇翰如新而平生蕭瑟每讀哀江南賦及通
天臺表未嘗不掩卷欲絕豈知今日身丁枉濫百倍
斯人魑魅爲鄰豺虎同界煩冤侘傺誰可訴語卽復
生平故人亦復棄如糞壤視同腐鼠矣不弔昊天一

何至此昨歲出塞時長安諸公哀其窮乏餉以百金
稍得整料衣資支離道路及屆藩京便已懸磬賴陳
子長解衣推食事事周全揮涕贈金情款綢繆既將
東發復贈我鞍馬以濟崎嶇塞外之路險甚蠶叢紅
鏤烏稽十步九折若非驥足已委溝中矣弟曩年知
契幾徧三吳嵇阮之交亦頗不乏及遭患難轉徙窮
途乃初無一欸之人周我涸轍此古人所以致重
于窮交也放廢以來萬緣都廢惟雕蟲一道猶尙纏
綿塞天無事寂坐荆扉斧冰炊稗以充饑渴所携故
簾尙有殘編每啜糜之暇輒與龍眠諸君子商確圖
史酬唱詩歌街談巷曲頗成一集取楊子雲哀屈之

文命曰質籛入秋以來復事賦學妄謂可以規模江
鮑接跡王揚但負罪之人爲時捐棄縱調如白雪才
似和璧亦將唾涕視之矣彼才不逮于中人名不出
千里間一旦身躋雲霄從容輦轂雖復伏獵侍郎金
根校理得其片言隻語以爲韓歐復生兄聞此言得
無駭其任誕乎客緒邊愁百端橫集停雲之念無時
去懷但恨玄菟黃龍渺在天末不特把袂銜杯難尊
佳會卽雁書遙訊慰我離愁亦眇不可得十年神契
睽絕如斯憶舊撫今愴恨何已杜少陵云親朋滿天
地兵甲少來書信非虛語也懷念之什頗有數章欲
便錄寄以當良覲恐此札達時正兄等春明得意之

候不祥姓名致駭耳目故復焚棄聊托敦四書排律
一首奉正想兄見之當相淒惻也倘承見懷幸有以
相示昔嵇中散身死洛下而向子期爲之感舊鄭廣
文遠竄台州而杜拾遺爲之錄別兄等雅懷當不以
廢棄相遺也弟有家信一緘欲托之右兄恐右兄已
奉使出都復托之公肅乞甫老爲我覓一確郵致去
倘家父已到或將入京幸留在尊所萬勿浮沈拜囑
拜囑西望裁書可勝鳴邑南風甚勁幸惠音書不勝
企望之至

李侍御枉駕因留小飲

涼秋紫塞謫官多三徑蕭條侍御過海外聞君名已久
長安別後事如何且將濁酒澆胸臆莫爲悲笳廢
嘯歌放逐幸同堯舜世儘拚身世老漁簑

壽郭明府

紅蕖玉淑映晨霞百里江皋早放衙風偃訟庭聞綠
綺日長仙閣有丹砂共看香令衣如繡欲問神人棗
似瓜今日試聽循吏頌知君清譽滿京華

送丁泰巖晉秩開府之任湖南二十韻

湘漢雄風地岫嶠大火峰芝旗松子宅茅社竹王封
十載司藩翰三吳薦鞠凶傷魚垂戢戢哀雁失雍雍

羽檄飛難定軍儲困屢供戈船宵並濟井日夜無春
望望爲霖切穰穰覆露濃千家收玉粒半壁鄣金墉
絕塞催歸騎公門獲拜龍相依星改歲多幸日長冬
屬郡謳歌載明廷服命庸列臺森梓柏開幕展芙蓉
青草流千曲蒼梧樹幾重彼郊忻迓郭舊域恨徵龔
玉琯陽初轉金塘凍始溶去旌看縹緲征鐸響春容
扶杖人爭送攀轅路盡壅愛碑留石篆鑄像寫金銘
江冷鱸應憶峯迴雁可從荆揚如一派仰沫待朝宗

明妃曲

妾本良家女奉帚掖庭中椒閣香消悲曉月玉墀花
積閉春風春風寂寂君恩絕薄命還教辭漢闕乍可

深宮罷玉顏誰堪遠嫁啼紅頰一向天涯去不還風
沙遙望白狼山鏡中玉筍消春色馬上檀槽怨朔寒
可憐玄朔寒應早蘆管淒涼沙浩浩白雪疑飛桂苑
花黃雲不散葱山草草色連天羶帳開蛾眉憔悴妾
心哀夜夜屠蘇青海上那能重見翠華來

咏龍鶯應教

黃鸝何曉睨牽弋下遙岑不惜雕籠住承君綺閣深
身微空曉翻囀巧自春心已免韓嫣彈何須更擇林

戲贈

承恩楚殿前綠幘自翩翩着粉春姿媚參紅雪態妍
情深陪射兕寵極織輕蟬却笑纖腰女新粧只自憐

登樓有懷成容若

雨餘宮樹迥含烟，獨立高樓思渺然。
遙憶關山人去遠，不知何處駐香鞭。

和凱公送令兒侍中扈從之作

玉輿避暑出黃華，千里霓旌映塞沙。
爲問帷宮誰珥筆，馬卿詞賦爛如霞。

又

廣庭花月自幽閒，一曲驪歌悵度關。
應識鵲鴿原上意，長依龍武輦前山。

贈葉長民

錦水桃花暖銅梁，杏葉初看君西去。
日何似馬相如。

右集詩文共八卷先君子漢槎先生所作也先君
少負大名登順治丁酉賢書爲仇家所中遂至遣
戍寧古維時大父母在堂先君忽離桑梓而謫冰
雪觸目愁來憤抑侘僚登臨憑弔俯仰傷懷于是
發爲詩歌以鳴其不平雖蔡女之十八拍不足喻
其淒愴此秋笳所由名也崑山徐健菴先生悲故
人之淪落千里命介索其草稿梓以問世古人之
交情不以窮通少異有如此者洎乎長白賦奏而
特邀當宁之知沈寃昭雪賜環歸里張儉返于
亡命蔡邕召自髡鉗推轂者總屬鉅卿延譽者半
由名士方且謂一生抱負抒展有時何圖乍入玉

門遽捐館舍鄙人所以抱恨終天也今

振臣

年過

六旬追思往日幾同隔世傳曰先祖無美而稱之是誣也有善而勿知不明也知而勿傳不仁也

振

臣愚蒙不肖旣不能發名成業以顯揚我先君矣

敢復蹈不仁不明致使先君沒沒于後

以愛就

舊刊增以家藏析爲八卷彙成一集其前四卷係

健翁所刻後四卷則

振臣

所增也後集爲成所暨

歸來所作前集及雜體詩二卷皆少年所作序表

書記則合新舊所抄輯而成不分年月日蓋先君

垂髫之歲卽好吟咏加以身際艱難著作頗富奈

屢丁顛沛存者無幾當健翁索稿之先值有老羌

之警遺失過半

後遇捕哈喇之亂都統唐公限三日內合城滿漢俱遷至必兒汀避

難

及扶柩南還復覆舟于天津而沉溺者又過半

今此所補皆從故舊處搜羅所得殆未及十之一二至于駢麗之體向與陳陽羨齊名乃集中所有僅此數首尤可痛惜聞之崑山某氏收貯頗多臣曾力爲尋訪而已移居村舍然終當物色以成全璧是則鄙人之素志也是役也其訂証校讐之功姪恆叔之力爲多亦不可不記謹跋

雍正丙午秋八月男振臣謹跋